

PÍTIUR Emka papin aar akupkamu

Pítíur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarne. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarne.

² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanjjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitiajnua nu arutramji.

⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiti. Tura nusha yajauchichuiti.

⁵ Yus nekas enentáimta asakrumin ni kakarmarijijai wearmarme. Tura tuke uwemtikrampratniun, nunka amuuamunam paant iniakmasatna nu achikmintrum tusa tuke tsawant ni kakarmarijijai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam péñker pujustaj tu enentáimsarum wararme.

⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia ajñ túruiniawai. Atumsha, itiurchat wáñkiarmena nujai, Yusan nekas enentáimtusartimpiash tusa nekapsamuitrume. Nu enentáimtamú kurijijai nankaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asantai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaitiatrum anearme. Tura yamáí wáinchiatrumek nekas enentáimtarme. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji.

⁹ Iimiatarum. Uwemtikrurat tusarum Yus umirkachurmek. Nu uwempratin wainiu asarum waraarme.

*Krístujai ii uwempratniun yaunchu etserkarmi-
ayi*

10-11 Yus áentsun waitnenta asa, uwemtikrataj tusa tuke wakerimiayi. Núnaka Yúsna etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurin jintiarmiayi. Tura ukunam ni ti shiir pujustintríncha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi.

12 Tura nii pujuiniainkia túrunashtinian, antsu ti ukunam, ii pujajnia jui túrunatniun Yus nekaamtikiarmiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakani, nayaimpinmaya akupkamu ana nuna nekatairijiai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

13 Tuma asamtai, pénger enentáimsarum tura pénger ímiasrum wekasatarum. Tura Jesukristu ukunam wantiniak waitnentramp Prattana nu yawetsuk nákastarum.

14 Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

15 Ashí túramurmijiai timiá pénger wekasatarum. Yus, untsurmakuana nu, pénger asamtai, átumka ni shuari asarum pénger wekasatarum.

16 “Wi pénger asamtai atumsha pénger wekasatarum” Yus tana nu ni Papiirin áarchamukait.

17 “Yus winia Aparuiti” tárugna nu aneartarum. Ashí aentsu túrutairin métek Yus nekaattawai. Nu

neka asarum, ju nuṅkanam pujarmena juí Yus ashankatarum.

18 Warí, ánta wekasatniun atumí uuntri jintinramarmena nuyá Yus uwemtikramprarme. Túrasha kurisha kuitcha amuukamnia ainia nujai uwemtikrachmaitrume.

19 Antsu Kristu numpe ti shiira nujai uwemtikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajai” tíniuyayi. Núnisan Kristu in jarutramka asa ii tunaarínia uwemtikrampraitji.

20 Nuṅkan nájantsuk áentsun jaruktinian Krístun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi.

21 Nijjai átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya péñkernak túrawai titiarum tusa túraiti.

22 Yus nekas tana nuna, Yusa Wakani yainmakui, umirka asarum atumí wakaniiñ péñker ajasuitrume. Yus-shuarjai yajauch enentáimtunaitsuk mai anenai ajatai tusarum tura asarum, nekas shiir enentáimtusaisrum mai anenai ajatarum.

23 Nekaatarum. Yusa chichame umirka asarum atak akiiniaitrum nuka ju nuṅkanmayanchuiti. Antsu Yusa chichame iwiaaku tuke amuukachmin ana nú chichamjai tuke iwiaaku átiniaitrome.

24 Ju ayash tuke pujuschamniaiti. Yusa Papiriin junis áarmaiti:

Ashí aentsti nupáa áaniuitji. Ii penkerisha kukuja áaniuiti. Nupa wárik kaawai. Kukujsa núnisan wárik iniaawai.

25 Tura Yusa chichamesha tuke amuukachmini-aiti.

Nu Chichamjai uwempramnia asantai atumin etsernakuiti.

2

1 Tuma asantai, ashí yajauch ana nu iniaisatarum. Anañkatin, ántar-chichamtin átin, chikichna wakeruktin, ashí tsanumpratniusha iniaisatarum.

2-3 Antsu, Uunt Jesukristu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejai tuke tsawant tsakakrum tuke uwemprami tusarum túratarum.

Iwiaaku kaya

4 Ii Uuntri Kristu kayáa áantsan ketete. Tura shuar kayan yajauchin nakitiainia núnisan Jesukristun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti.

5 Atumsha iwiaaku kaya áantsan ketrum. Tuma asarum Yus wijjai ni jeen jeamti tusarum tsan kamaktarum. Tura nútiksarmek Jesukristui atumí iwiaakmarj tsan kamaktarum, Yus wakera

nuna túrutati tusarum. Jesukrístujai tura asarum Yus shiir enentáimtikrume.

⁶ Jesukrístunun Yusa Papiriin júnis áarmaiti:
 “Istarum. Kayan ti penkeran achikjai” Yus tímiayi.
 Jeān emka apujtuamurī atí tusan Seuñnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukrístun tawai.

⁷ Yus umirkaitrumna nu, “kaya ti penkeraiti” tarume. Tura Yúsan umirainiatsna nuka Yusa Papiriin tana nujai métek áiniawai. Ju áarmaiti:
 Jeān jeamin nakitarmia nú kaya jeān emka apujtuamurī atí tusa apujamuiti.

⁸ Tura jusha aarma awai:
 Tukumak iniaartin kayaiti.
 Kame shuar Jesukrístunun etserkamun nakitiakka, ¿enentáinium itiur péñker wekasat?
 Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, winian pujurtursarat tusa yajauchinmaya Uunt Yus akantamkaitrume. Yusna asarum péñker enentáimin ajasurme. Tura Yus sumakmaitrume. Niisha winia péñkerun etserturkarat tusa túrait. Kame kiritniunmaya jíinkirum ni tsáapnintrin wekasatniun achirmakurme.

¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumniñ, ¿ya waitnentrampria? Antsu yamaikia Yus waitnentrामuitrume.

“Yúsnaitjai” tu enentáimsatin

11 Yatsurtirmin tájarme, Yusna ajasrum, ju nunkanam írar matsatu asarum, atumí ayashí wakerana nu tsan̄katakairap. Ayashim wakerana nu túrakmiñkia ame enentáim nujai yajauch ajastatui.

12 Yus-shuarchanum péñker wekasatarum. Túrakrumniñkia niisha yamáí “Yus-shuar yajauch túruiniawai” ántar tuíniayatan, ukunmañka, Yusjai in̄kiunaiktin tsawant jeamtai, péñker wekarmena nuna enentáimturmasar, nú shuarsha Yúsan shiir awajsartatui.

13 Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

14 Tura ni akupeamuri ainia nusha tunaan túruinia núnaka asutiáti tura péñkeran túruinia núnaka shiir awajsati tusa uunt akupin akupkamu ásarmatai umirkatarum.

15 Nekas péñker wekaamurmijjai enentáimcha ainia nu netse chichaamuri itiatmamtikiatarum tusa Yus wakerawai.

16 Tunaanumiã an̄kant ajasu asarum péñker wekasatarum. Túrasha wi an̄kant ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

17 Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

Yus-shuarti katsuntratin

18 Takarniutirmesha ame úuntrum péñker shiir enentáimturmakeisha tura yajauchiitkuisha umirkatarum.

19 Nekaatarum. Ántar wáitkiarmainia nuĭ, “Yus iirui” tu enentáimsa katsunteakrumka, ti penkeraiti.

20 Yajauch túrawakmin asutiámamtai katsunteakmeka nuĭsha wariñ ati. Antsu penker túrawakmin asutiámamtai katsunteakmeka juĭka ti penker túrame Yusaj.

21 Núnisanĭ túrunatin achikmaitrume. Kristu waitrutmasmiarme nuĭ, Wi túraj núnisanĭ túrawarmi tusar wáitsamiayi.

22 Krístuka tunaan penké túrachmiayi. Tura chikichkinkesha penké ananĭkachmiayi.

23 Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iistí’ tímiayi, Yus penker túrin asamtai.

24 Kristu Niñki ni ayashĭin ii tunaarĭn entsaki krúsnum jarutramkamiaji. Tunáa enentáimtusairum tusa, antsu Yusaj penker wekasamniuram tusa jarutramkamiaji. Atumí enentáin tsuártaj tusa Kristu asutniámiayi.

25 Murik ni pujutairĭin waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurĭin waketkintrume. Atumí wáitmau Krístuiti, atumí enentáin wáinnia nu.

3

Nuatnaikiaru itiuur túratniuit

1-2 Tuma asamtai, nuwatiram atumí áishri umirkatarum. Amesha penker, Yus umirka weká asakmin, áishrum Yus-Chichaman umirchaitiat,

ame túramurmin nekáa, ámeke chichaatsminin, niisha Yus-shuar ajastinian wakerittiawai.

³ Nu asantai aya pátatek iwiarmampratniusha ti enentáimtusairap. Intiash ti penker iwiaratniusha, kuriijai iwiarmampratniusha, pushí ti kuitjai entsartincha ti enentáimtusairap.

⁴ Antsu, “nekas shíirmach ajastaj” tákumka, enentáimin “shiir kajechu átajai” tu enentáimsatarum. Nuka sakarchattawai. Tura nuka Yúsnumka ti penkeraiti.

⁵ Yaunchu núnisaran nuwa Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shíirmach ajarar pujuarmiayi.

⁶ Atumí weatri Sara ni áishrin Apraáman umirmiayi. Umirin asa, “winia uuntru” t́iniuyayi nin. Atumsha penker túrakrumka tura sapijmiatsuk wekaakrumka, Sarajai métek átatrume.

⁷ Tura áishmantirmesha Yus wakerana nu nekaarum atumí nuwe shiir enentáimtusurum tsanintarum. Nuwemsha, nuwa asa, áishmanjai métek katsuntrachminiaiti. Tura niisha, ámijjai métek Yusa waitnenkartutairijjai tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujkuram itiurchat atsuti tusarum túratarum.

Yúsnum penker wekasatin

⁸ Nuyasha ashí Yús-shuartermin tájarme, aya chikichik enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum.

⁹ Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum.

¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuñka tura tuke tsawant warastinian wakerana nu, péñker íimiastí, yajauch chichakaj tusa tura wáitruawaj tusa. Tunaanumiá kanaki péñkeran túratí. Tuke enentáijaj shiir átinian eakti.

Tu áarmaiti.

Itiurchat aín péñker túratin

¹³ ¿Yaki yajauch túrutmat péñker turamnisha?

¹⁴ Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashankartutsuk, sapijmiatsuk wekasatniuitrume.

¹⁵ Tura “Kristu winia Úntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata.

¹⁶ “Yúsaj péñker wekasataj” tu enentáimsarum wekasatarum. Yus-shuar asakrumin chíkich shuar ántrar áujmatramainia nu ni ántar áujmatramsamun nekaawar natsaárarat tusarum Yusaj péñker wekasatarum.

17 Yajauch túrakur wáitsatniujai^unkia nankaamas, Yus wakeraku^unkia péⁿker túrakur wáitsatniuka ti péⁿkeraiti.

18 Kristu ii tunaarⁱn asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan péⁿké túrichuitiat, ii tunáa asakrin wáitrutmasmiaji, Yúsnum ejetamtai tusa. Ayashⁱinkia jakayat ni wakanⁱjiaⁱ ni ayashⁱ ataksha iwiaaku ajasmiaiyi.

19 Ni wakanⁱjiaⁱ jakáa wakanⁱn emetamu armia nuna etserkataj tusa wé^miaiyi.

20 Nusha yaunchu Nuai uunt kanun nájanuk siaⁿtu painti (120) uwi pujurmia nuⁱ Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijaⁱ uwemtikrarmiaiyi.

21 Nu yumi Yus-shuarti imiantinian nakumui. Ii ayashⁱ chamir awajsatai tusar imiantsuji. Antsu ii enentáⁱ péⁿker atí tusar Yus sear imianji. Nujaiⁱ iisha uwemji. Jesukrístu nantakin asamtai, nujaiⁱ uwempraitji.

22 Tura Niisha nayaimpiniam we akupin puju-tainium Yusa untsuurⁱini apujsamuiti. Túramtai nayaimpinmaya^u suntarsha, tura ashí kakaram akupin áiniana nusha Jesukrístun umirainiawai.

4

Ju nun^ukanam wáitsatin

1 Kristu ni ayashⁱin wáitsa asamtai atumsha núnisrumek wáitsatin ákuisha, katsuntratjai

titiarum. Ni ayashiin wáitiana nú shuar yajauchin páchiatsui.

² Antsu “iwiaakjana nukia Yusa wakeramurin tuke umirkatjai” tu enentáimiui. Ni ayashi wakerana nuna yamaikia páchiatsui.

³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme.

⁴ Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtaí iniaisara?” tusar yajauch áujmatramprume.

⁵ Túrasha ukunam nu aents ni túramurin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui.

⁶ Túrasha jaka armia nu Yusa shiir chichame ujankarmiayi. Ni ayashiin ashí shuarjai métek jakamniaitiatan Yus iwiaaku pujana núnisan ni wakani iwiaaku pujusarat tusa ujankarmiayi.

Shuar yáintiniaitji

⁷ Ashí amuukatin jeatemayi. Tuma asamtaí pénker enentáimsatarum; túrarum anearum Yus aju pujutarum.

⁸ Aneniamujai untsuri tunaasha tsankuratin awai. Tuma asamtaí ashí nankaamas nuamtak anenaistarum.

⁹ Kajé-kajejainchu atumí jeen itiaaniátarum.

10 In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai péⁿker takaawa áintsarmek Yus amasmania nujai ame írutramuram yaiⁿtá.

11 Etserkatniun Yus amasuitkiuinkia ame tamena nu, Yus tana nujai métek atí. Chíkich shuar yáⁿtiniaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijiaⁿi túrata. Jesukrístun ashí aents shiir enentáimtusartí. Tura ashí áentsnum ni kakarmariⁿ take atí. Nuna tajai.

Yus-shuarti wáitsatin

12 Aneamu yatsurtiram, ti waitsatin nekapram-sartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniati.

13 Tuma aⁿi shiir enentáimsatarum. “Kristu wáitsamuriⁿ métek-taku wáitiakun péⁿkeraiti” tu enentáimsatarum. Ukunam Kristu winchariⁿ wáinkiarum timiá warasmi tusarum túratarum.

14 Krístunu asakrumin katsekkramkachartimpiash. Túmaitkiuisha Yusa Wakanⁱ shiir ana nu atumiⁿin pujurtamkui shiir awajsamuitrume. Katsekkramainia nú shuar imia Yusa Wakanⁱin yajauch áujmatainiawai. Tura átumka Yusa Wakanⁱ shiir awajearme.

15 Túra atumsha yajauch túrawaⁱirum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniuriⁿketete. Atumjain^kia nu wáitsatniuka atsutí.

16 Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiayatmek, natsamtsuk Kristu naari shiir awajsata.

17 Yuska ni shuarin nekapsatajtsa nan̄kamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartiñ. Ti asutniáwartatui.

18 Imia Yus umirjinia nu uwempratniuri itiurchataitkiuisha tunaan túruiniana nusha urukawartiñ.

19 Tuma asamtai Yus wakeramujaj wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

1 Yamaikia Yus-shuara úuntritiram, jintintjarme. Wisha núnisnak Yus-shuara úuntrintjai. Kristu wáitsamuriñ wáinkiaitjai wisha. Tura ukunam ti shiir átatna nuñ chíkich Yus-shuara uuntria núnisnak wisha pachiinkiattajai.

2 Yus-shuar ame ístiniaitmena nu, péñker iistá, murikiu wáinin ni murikriñ wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai” tútsuk tura nujaj kuítrintin ajastin enentáimtsuk nekas wakeritia, Yusa takatri asamtai.

3 Turasha, “Yús-shuara uuntri ajasan, Yus-shuaran akuptaj” tu enentáimsaip. Antsu shiir túramurmijaj Yusa murikri jintintiata.

4 Nuñkia murikiu wainniu Uuntri taa wantiniak iwiarmantai tawasap ti shírmachia núninian suramsattawai. Aents sána nú shírmach wari mamurtiniaiti. Tura Uuntrum ámin suramsattana nuka penké mamurchattawai.

Yus-shuarti umirnaikiatin

5 Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nankaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nankaamantuchu enentáimtuma nuna Yus waitnentak yayawai. Tu aarmaiti.

6 Wats, Yus timiá kakaram asamtai, amek nekamam, péejchach enentáijiai enentáimtumasta. Nuñkia tsawant jeamtai ní wakerak Yus ámin penkeri awajtamsattawai.

7 Yus ámin ti enentáimturmakui ame itiurchatrum ainia nu Yus ashí iiktusta.

8 Aneartarum tura ímiastarum. Íwianch atumí nemasri ana nu, uunt yawáa nuke, yanak emes-raintiaj tusa eajak tentaa wekaawai.

9 Tura tuke Yus nekas enentáimtusrum surimiaktarum. Ashí nunkanam Yusnum atumí yachi ainia nu átum wáitiarmena núnisarañ wáitiainiawai. Nusha kajinmakchatniuitrume.

10 Wats, ishichik tsawant wáitsarmena nu nankaasmatai Yus ataksha penker awajtamsattarme. Tura numi wewe wajana núnisarañ ikiakátmartatrume. Tura Yus ikiakárma asarum ni jintiin tuke penker wekasattarme. Ju Yus tuke in waitnentramtsujik. Tura iisha

Jesukrístunu asakrin Niijjai métek Yus ni shiir pujutainium tuke shiir pujusmintrum tusa achirmakuitji.

¹¹ Nú Yúsnasha ashí aents shiir enentáimtusartí. Tura ashí áentsnum ni kakarmari tuke atí. Nuke ati.

Amiak áujmamsamu

¹² Serpanujai ju papin ishichik áarmaj nuna akupeajai. Serpanu Yusjai péñker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijiai. Tura tuke ni waitnenkartutairiin wekasatarum tájarne.

¹³ Papirúnianmaya atumjai métek Yus achikma áinia nu amikmaatmarme. Winia uchir Markus núnisan amikmaatmawai.

¹⁴ Yusai yachi ajasu asarum anenaisrum shiir awajnisatarum. Jesukrístunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

**Yus Papi: Shuarjai Yus Yamaram Chicham
Najanamu
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

fb10d1f0-e2d5-5d8e-8a74-10846708c857